

Na osnovu člana 251. stav 5. Zakona o osnovama sigurnosti saobraćaja na putevima u Bosni i Hercegovini ("Službeni glasnik BiH", br. 06/06, 75/06, 44/07, 84/09, 48/10 i 18/13) i 51. 26. i 28. stav 2. Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka), Vlada Kantona Sarajevo je, na 56. sjednici održanoj 08.09.2016. godine, donijela

ODLUKU

O OSNIVANJU VIJEĆA ZA SIGURNOST SAOBRAĆAJA NA CESTAMA U KANTONU SARAJEVO

I

Ovom odlukom osniva se Vijeće za sigurnost saobraćaja na cestama u Kantonu Sarajevo (u daljem tekstu: Vijeće), utvrđuju se poslovi, zadaci te sastav i način rada Vijeća.

Vijeće je radno savjetodavno tijelo Vlade Kantona Sarajevo, s ciljem podsticanja preventivnih i drugih aktivnosti u oblasti bezbjednosti saobraćaja i razvijanja saobraćajne kulture sudionika u saobraćaju na cestama.

II

Zadaci Vijeća su:

- sudjelovanje u pripremi politika, strateških, planskih i programskih dokumenata iz oblasti sigurnosti saobraćaja na cestama, koordiniranje aktivnosti potrebnih za njihovu realizaciju, praćenje realizacije;
- priprema izvještajnih dokumenta iz oblasti sigurnosti saobraćaja na cestama;
- praćenje i analiziranje stanja u oblasti sigurnosti saobraćaja na cestama;
- predlaganje nadležnim tijelima i organizacijama mjera i aktivnosti koje je potrebno poduzeti s ciljem unapređenja sigurnosti saobraćaja na cestama;
- sudjelovanje u aktivnostima koje se provode s ciljem obrazovanja i informiranja javnosti i podizanja svijesti javnosti o značaju sigurnosti prometa na cestama, kao i u drugim aktivnostima i akcijama koje se provode s ciljem prevencije i unaprjeđenja sigurnosti prometa na cestama.

III

Članove Vijeća imenuje Vlada iz reda stručnjaka iz oblasti cestovnog saobraćaja, Ministarstva saobraćaja (u daljem tekstu: Ministarstvo), Ministarstva unutrašnjih poslova, Ministarstva komunalne privrede i infrastrukture Kantona Sarajevo, Ministarstva za obrazovanje, nauku i

mlade, Ministarstva zdravstva, Ministarstva prostornog uređenja, građenja i zaštite okoliša, javnih preduzeća i institucija.

IV

Vijeće ima predsjedavajućeg i dvanaest članova.

Predsjedavajući Vijeća je ministar saobraćaja Kantona Sarajevo.

Iz reda predstavnika nadležnih ministarstva i tijela koja upravljaju javnim cestama, članovi Vijeća su:

1. ministar unutrašnjih poslova Kantona Sarajevo,
2. ministar za obrazovanje, nauku i mlade Kantona Sarajevo,
3. ministar komunalne privrede i infrastrukture Kantona Sarajevo,
4. ministar zdravstva Kantona Sarajevo,
5. ministar prostornog uređenja, građenja i zaštite okoliša,
6. direktor Direkcije za puteve Kantona Sarajevo.

Vijeće ima 6 članova iz reda stručnjaka za oblast sigurnosti prometa na cestama.

Kriterije za izbor članova Vijeća iz reda stručnjaka utvrđuje ministar saobraćaja Kantona Sarajevo, uz uslov da imaju najmanje VII stepen stručne spreme i najmanje pet godina dokazanog radnog iskustva na poslovima u vezi sigurnosti saobraćaja na putevima.

V

Ministri i direktor Direkcije su članovi Vijeća po osnovu svog mandata, a članovi iz reda stručnjaka se imenuju na period od pet godina sa mogućnošću još jednog ponovnog imenovanja.

Vijeće imenuje Vlada Kantona Sarajevo rješenjem, na prijedlog Ministarstva saobraćaja Kantona Sarajevo.

VI

Članstvo u Vijeću prestaje:

- istekom mandata;
- podnošenjem ostavke;

- razrješenjem u slučaju ako imenovani ne obavlja ili nije u stanju obavljati poslove člana Vijeća.

VII

Vijeće u svom radu saraduje sa svim organima uprave, institucijama ili drugim tijelima nadležnim za poslove sigurnosti saobraćaja na putevima.

Saradnja se zasniva na načelima međusobnog dogovaranja i informiranja.

Nadležna tijela i druge organizacije su dužni osigurati izvještaje, podatke i dokumentaciju potrebne za rad Vijeća, te pružiti potrebnu stručnu pomoć.

VIII

Predsjedavajući Vijeća predstavlja Vijeće, saziva sjednice i stara se o organizaciji rada i izvršavanju dokumenata Vijeća.

Vijeće se sastaje najmanje dva puta godišnje.

Organizacijsku, tehničku i administrativnu podršku radu Vijeća pruža Ministarstvo saobraćaja.

Način rada i odlučivanja uređuje se Poslovníkom o radu Vijeća.

IX

Vijeće podnosi Vladi Kantona Sarajevo i Skupštini Kantona Sarajevo najmanje jednom godišnje izvještaj o stanju u oblasti sigurnosti saobraćaja.

Vijeće podnosi Vladi Kantona Sarajevo godišnje izvještaj o svom radu.

X

Članovi Vijeća iz reda stručnjaka za oblast sigurnosti saobraćaja na cestama imaju pravo na naknadu za rad čija visina se utvrđuje posebnom odlukom, ukoliko nisu zaposleni u organima uprave na bilo kojem nivou vlasti u Bosni i Hercegovini.

Naknada se isplaćuje iz Budžeta Ministarstva saobraćaja.

XI

Ministar saobraćaja, u roku od osam dana od dana stupanja na snagu ove odluke, pokreće postupak imenovanja članova Vijeća.

XII

Gramatička terminologija korištenja muškog ili ženskog spola podrazumijeva uključivanje oba spola.

XIII

Danom stupanja na snagu ove odluke prestaje da važi Odluka o obrazovanju Stručnog savjeta u oblasti prometnih komunikacija, prometa i telekomunikacija ("Službene novine Kantona Sarajevo", broj 6/99).

XIV

Ova odluka stupa na snagu osmog dana od dana objavljivanja u "Službenim novinama Kantona Sarajevo".

Broj 02-05-26600-25/16
08. septembra 2016. godine
Sarajevo

Premijer
Elmedin Konaković, s. r.